



QUÆSTIO MEDICA.

*Cardinalitiis disputationibus manè discutienda, die Jovis vigesimo
tertio mensis Martii 1713.*

M. PETRO-PAULO GUIART, Doctore Medico,
Præside.

An prægnanti deambulatio?

I.

FOEMINA, in cujus eleganti fabricâ partes inter se omnes cum quodam lepore consentiunt, non est naturæ monstrum, imò suis ipsa numeris omnibus perfectum & expletum animal ab illâ intenditur, quæ luculentum suæ dedit specimen industriæ, dum in eam ut sui delicias, tot veneres, & gratiarum ornamenta congeffit. Hæc quanquam animæ nobilitate viro non inferior, ab eo tamen animi viribus plurimum dissentit, & dotes possidet longè diversas, sicut quod in ipsâ concinnum, venustum, politum, & comtum apparet, id ipsum in viro effœminatum, fractum, molle & abjectum habeatur. Neque etiam partium tantummodo generationi inservientium situ & numero, sed & earundem structurâ, frigidiorique & humidiori totius corporis temperie à mare discernitur. Hæc digna conjugis amplexibus, ejusque adjuncta consortio, in se ipsâ generat, multumque confert ad opus omnium maximè naturale: unâ enim cum sanguine, quem, antequam huic operi navet operari, ut superfluum & solâ copiâ excrementitium singulis mensibus excernere solet, semen quoque sufficit atque subministrat, quod non semper virili postponitur: utrumque non animatum, utrumque prolificum est, & è solis testibus decedit, ad quos longo viæ tractu per vasa sinuosa arte singulari naturæ purior sanguis amplissimis spirituum copiis comitatus appellit, ut morâ diuturniore materia seminis præparetur, præparata à testibus recipiatur innatâ proprietate, ut unicuique parti corporis insitum est, proprium & sibi conveniens alimentum recipere more stirpium, quæ cognatum humorem & sibi magis familiarem ex parente omnium sellure sugunt & dulciter proleant.

UT promittunt divitias quas non exhibent, pauperes Alchymistæ, dum aurī sacra fame luridi ac penè enecti, alibi quam in fodinā confici atque fabricari contendunt: sic illi parum sui sunt memores, & magno conatu magnas nugas dicunt, qui alium ab utero locum homini generando substitui posse nimium credulis persuadent. Jaceret sanè divina vis insita semini, nisi mirabili uteri virtute suscitaretur, ubi, velut in solâ humani diversorii cellulâ, necessarii concurrunt apparatus, uniusque huic parti nobilissimæ innata virtus est semen proliciendi, in actum promovendi, suoque sinu & complexu amabiliter fovendi: atque ex parentis utriusque nexu & consuetudine, seminis ab utroque emissi integritate, arctaque illius intra fundum naturæ feracissimum retentione, & retenti promotione ad officium, tantæ molis opus exurgit, & gravida evadit mulier, cujus graviditas non ex solo ventris tumore, aut menstruorum suppressione, non ex oculis sublividis, aut urinarum substantiâ colore & sedimento, sed ex fœtus motu, ut certo & indubitato hominis inchoati inditio, dumtaxat agnoscitur, qui recipit & adipiscitur in utero tanquam in verâ vitæ officina nutrimentum, accretionem, maturitatem, & sui carceris impatiens ex illius latebris tandem emergit, ut lucem suavissimam aspiciat.

I I I.

MULIEREM utero gerentem velut agmine facto pravorum affectuum milias confestim invadit: modò ex depravatâ appetentiâ variorum premittitur desiderio, quæ interdum aut acida aut acerba, aut acria & falsa sunt: modò expetit testas, carbones, veteres pannos, & alia peregrina & à naturâ prorsus abhorrentia: modò illam fatigant & affligunt animi deliquia, gravedines, capitis dolores & dentium acerbissimi, streatus frequens, nausea, vomitio quoque plerumque comitatur eorum maximè humorum qui in præcordiis redundaverint; flatus sæpissimè permulti circum claustra fremunt, qui distendentes abdomen sævissimos cruciatus inferunt, totum denique corpus, iners, plumbeum, languidum, importunâ lassitudine fractum fatiscit: Hæc & aliæ gravissimæ quæ impendent procellæ, crebrò ortum repetunt ex vitioso quodam incremento ob suppressos menses ventriculi tunicis impacto, aut ex impuris vaporibus, nec rarò quoque contingunt prægnantis incautæ vitio, quæ & nimio languescit situ & pigritia, & omnis generis cibis indulget ac sese ingurgitat, quorum plerisque malè creditur, undè suæ quasi libidini relictî humores, nec amplius edomiti à naturâ, quæ penitus incumbit conformationi & perfectioni fœtus, magnâ copiâ coacervantur, & obstructions pariunt, nec non expiratione prohibitâ putredinem, & ferocem in dies induentes indolem magnas strages edunt ubicumque ponunt vestigium, cunctaque intus diruunt & turbant, ex quibus febres variæ ac infinitæ penè calamitates erumpunt.

I V.

QUEMADMODUM qui nullis se corporis motibus exercent, & inertia quietique perpetuæ se totos addicunt, crassitie & gravitate corporis enervati, deteriori valetudine fruuntur, ut quos occupat & obruit uberrimus

excrementorum proventus, quæ calorem nativum intercipiunt, corpus refrigerant, & morbis frigidis atque humidis materiam suggerunt: sic gravissima sibi importat mala gravis mulier, dum à quacumque corporis exercitatione prorsus abducitur, sibi & fœtui non parum amicâ & salutari. Causam sanitatis conservatricem agnoscit pars Medicinæ salubris motum & exercitationem: æquis illius legibus impunè nemo refragatur: non sinit ergo quemquam, cujuscumque sit ordinis & conditionis, absque magno sui detrimento, se totum dedere quieti, languori & desidîæ, his vitiis ipsamet natura reclamitat. Sic recens natis agitatio in cunis tenet locum exercitii, qui jam uteri latibulis conclusi, motu & calcitratu instituerant exercitationis cujusdam rudimenta: pueris competunt lusus & cursus temperati, adultis & robustis pila palmaria, venatio, equitatio, senibus ut jam effœtis & imbecillis, gravidis mulieribus, convalescentibus & nondum è morbo recreatis, deambulatio. Istæ exercitationes cuicque ætati & temperamento congruentes & idoneæ, ad prosperam valetudinem iter munitum ac exploratum exhibent, quarum scilicet virtute & beneficio gravium propellantur ægritudinum incommoda, quibus obventilationem occasio præceditur, necnon excrementa discutuntur, suâ experientiâ, morâ & cunctatione perniciem aspersura visceribus, calorque nativus solutus & liber redditur vegetior, alimenterum concoctio, distributio, nutritioque sit fœlicior, & functionum integritas totiusque corporis robur prodit.

V.

SUOS fœtus & maternos patitur manes, dum ad rem suam parùm attenta sgravida parens, veterino torpet & hebescit ignaviâ, amplamque excrementorum segetem congerit, quorum colluvie & contagione fordescit, & inficitur salutare fœtus pabulum, cujus benignitate destitutus, pravè nutritur, languorem vitiosamque constitutionem contrahit & labem, quæ, quamvis ipsa cupiat salus, nusquam eluitur. Sic caducis principiis fatus, & inopis vitalis fundi, nascitur iniquis conditionibus. Felix ille è contratio, qui toto gestationis tempore ex puro & laudabili sanguine materno, ut primo sui alimento, vim ortus sui duxerit & temperaturam in morbos nequaquam proclivem, ut non minùs bonâ constitutione, quam fortunarum possessione gaudeat. Fœtus ergo magnos percipiet sanitatis fructus, neque huic & sibi fœlicitatem exiguam accerset gravida parens, si servatâ idoneâ victus lege, cæterisque ad hunc statum requisitis, moderato corporis motu se exerceat, non quidem vestatione in curru, quæ frequentiores abortus sciet, mulieri vacanti ad tœdium demulcendum præscribendâ, non aliis laboribus seu exercitiis, pueris, adultis & robustioribus concessis, in quibus corpus nimium agitur, verùm deambulatione cuicque graviditatis tempori accommodatâ, per vias tritas, planas, à solis ardoribus tutas, platano cœlibe conspersas & opacas, cujus usu jucundo in gratiam redit cum alimentis salubribus, corpus universum non nihil incalescit & ventilatur, onustum levatur, ac superfluis plerisque vacuum evadit, facilis sit & libera spiratio, omnis lassitudinis sensus castigatur, causaque tot affectuum quibus graviditas oportuna est, quasi statione relictâ, dissipatur & evanescit: quæ demùm artubus potissimum inferioribus, uteri ligamentis, mus-

culis abdominis vigorem qui sufficiat ventris oneri, firmitatem & alacritatem procurat: hinc vires se proferent ante omnia labori partus sustinendo pares, qui naturalis conditiones sortitus, haud dubiè lucinâ etiam non opem ferente, faustum habebit eventum, & prægnaus pulchrâ faciet se prole parentem.

Ergo prægnaus deambulat.

Asserebat Parisiis CLAUDIUS-ANTONIUS RENARD,
Parisius, Baccalaureus Medicus, A. R. S. H. 1713.

PARISIIS,
Apud J. QUILLAV, Typ. Jur. Lib. Universitatis.